

**ANDAMUSEA ARMÂNEASCĂ DI CRUSHUVA**  
**5-li di Agustu 2012, CRUSHUVA / RIPUBLICA MAKIDUNIA**

**Noi,**

**Armânjilji / Makedon-Armânjilji** ditu tuti craturli iu bânămu, tsi himu adzâ la aestâ Andamusi Armânească di Crushuva / R. Makidunia, câsâbă thimiljiusitu di strâpâpânjilji-a noshtsâ,

**Luyursindalui câ Armânjilji / Makedon-Armânjilji** – atselji di nai ma veclji tu aesti locuri ditu Balcanu – di daima furâ cândâsits câ tuti etniili cu cari bâneadzâ deadunu, fârâ s-hibâ loati tu isapi limba, buiaua politicâ icâ di pisti, s-aibâ idyili-ndrepturi,

**Cara s-minduimu** câ anamisa di vecljili populi evropeani, autohtonji tu Balcanu, Armânjilji / Makedon-Armânjilji – cu a loru sinidhisi ti cultura, limba, adetsli sh-pistea tsi lâ da vrearea sâ s-aspunâ tu lumi câ facu parti ditu idyiulu populu – suntu unâ paradihmâ di banâ deadunu cu alanti populi,

**Mutrindalui** tuti atseali nomuri evropeani sh- internatsiunali – Conventsiunea Evropeanâ ti Ndrepturli a Uomlui (1950), Conventsiunea ONU andicra di Ndrepturli Tsivili sh-Polititsi (1966), Conventsiunea-Cadru trâ Avigljarea a Minoritâtsloru Natsiunali (1994), Carta Evropeanâ a Limbilor Reghiunali icâ Minoritari (1992) – tsi furâ aprukeati maxus ta sâ aveaglji atseali populi fuvirsiti cari s-aflâ tu idyia catandasi tu cari s-aflâ sh-popullu Armân,

**Ti tuti aesti itii, [Consillu a Makedon-Armânjiloru](#) apufuseashti aestâ**

**DIMÂNDARI**

- **Consillu Makedon-Armânjiloru** caftâ la tuti craturli ditu Balcanu, iu bâneadzâ Armânjilji (Arbinishia, Gârtsia, Rumânia, Ripublica Makidunia, Sârbia, Vâryâria) ca tuti institutsiunli tsi au borgi tu dumenea ti ndrepturli a uomlui s-cilâstiseascâ trâ avigljarea a yishteriloru shi a identitatiljei etnicâ, culturalâ, lingvisticâ shi di pisti a Armânjiloru.
- **Consillu Makedon-Armânjiloru** caftâ la tuti craturli ditu Balcanu, iu bâneadzâ Armânjilji, s-asiyuripseascâ ndrepturli tsi lâ si pricadu Armânjiloru ca populu regionalu, acshi cumu u spunu nomurli evropeani sh-internatsiunali trâ populi fârâ „kin state”.
- **Consillu Makedon-Armânjiloru** caftâ la guvernulu ditu Ripublica Makidunia – singurlu cratu ditu Balcanu iu Armânjilji suntu pricânâscuts tu Cunstitutsiuni ama iu nica suntu alargu di-atseali ndrepturi cari dealihea s-lâ asiurpseascâ developarea a limbâljei sh-a culturâljei a loru – unu dialogu dishchljisu trâ unâ cama bunâ cooperari / lucru deadunu anamisa di Armânami sh- institutsiunli ditu aestu cratu tsi au borgea s-andrupascâ popullu Armân pritu proyrami minduiti deadunu.
- **Consillu Makedon-Armânjiloru** caftâ unu dialogu dishchljisu, dimocraticu, cu tuti guvernili a craturiloru balcanitsi, iu bâneadzâ Armânjilji, tra sâ s-aflâ cäljiurli trâ yinitorlu a limbâljei sh-a culturâljei armânească, va s-dzâcâ bângarea a limbâljei tu sculii, mass-media shi bânearicâ.
- **Consillu Makedon-Armânjiloru** caftâ la tuti guvernili ditu Balcanu, iu bâneadzâ Armânjilji, s-aproaki tu Constitutsiuni unu nomu cari s-aveaglji cultura sh-limba armânească ca parti di patrimonlu natsiunali a cratlui, acshi cumu s-adrâ tu Frântsii cu yishtearea culturalâ a Bretonjiloru, Provensaliloru, Catalanjiloru etc.

Dimândarea apufusitâ adzâ, 5-li di Agustu 2012, Crushuva / R. Makidunia, cu furnjia ali Andamusea Armânească.

tu 5-li di Agustu 2012 / Krushuva, R. Makidunia